

ASO FARAILE, 20 IUNI 2014

Na nofoia le Nofoa e le Fofoga Fetalai i le itula e 9:00 i le taeao.

Tatalo.

MALELEGA MAI LE SUI O LE FONO A SUI TOFIA

Na fofogaina e le Fofoga Fetalai le Malelega mai Le Sui o le Fono a Sui Tofia.

“TUSI mo:

Le Fofoga Fetalai:

E tusa ai ma le Mataupu 59 o le Faavae o le Malo Tutoatasi o Samoa faapea Tulafono Tumau 95 a le Palemene ua tuuina atu nei le maliEGA i le Fono Aoao Faitulafono na te iloiloina ai ia Tulafono Tau Faaofi ua faaalua iinei:

1. Tulafono Tau Faaofi o Teuteuga o le Faavae (Nu.2) 2014.
2. Tulafono Tau Faaofi o Teuteuga o le Tulafono o Faamalumaluga e Faamau ai Meatotino Tau le Tagata Lava Ia 2014.
3. Tulafono Tau Faaofi o Teuteuga o le Tulafono o Aso Malolo mo Tagata Uma 2014.

TUUINA ATU i lou nei Lima i lenei Aso Tofi 19 o Iuni i le tausaga 2014.

(Sainia): Tuimalealiifano Vaaletoa Sualauvi II
SUI O LE FONO A SUI TOFIA”.

TUUINA ATU O PEPA

Na tolaulauina e le Failautusi Pepa ua tuuina atu e tusa ai ma T.T.48.

1. P.P.2014/2015 Nu.52, Lipoti Faaletausaga a le Matagaluega o Punaoa Faanatura ma le Siosiomaga 2010-2011.
2. P.P.2014/2015 Nu.53, Faamatalaga o Tupe a le Malo mo le Tausaga Faaiiina aso 30 Iuni 2011.

3. P.P.2014/2015 Nu.54, Faamatalaga o Tupe a le Malo mo le Tausaga Faaletupe Faaiiuna aso 30 Iuni 2012.
4. P.P.2014/2015 Nu.55, Faamatalaga o Tupe a le Malo mo le Tausaga Faaletupe Faaiiuna aso 30 Iuni 2013.

TUUINA ATU O LIPOTI A KOMITI FILIFILIA

Na tolauluina e le Failautusi Lipoti a Komiti Filifilia nei ua faataatia i luga o le Laulau a Fono e tusa ai ma le T.T.51.

1. P.P.2014/2015 Nu.56, Lipoti a le Komiti o Mataupu tau Faamasinoga, Leoleo ma Falepuipui ma Faamasinoga o Fanua ma Suafa i le Tulafono Tau Faaofi o le Faamasinoga mo Mataupu Faatatau i Aiga 2013.
2. P.P.2014/2015 Nu.57, Lipoti a le Komiti Suesue Faapitoa a le Palemene e tusa ai ma le Faatonuga a le Fofoga Fetalai o le aso 21 Iuni 2013 e uiga i Faamaumauga na Tauaaoina e le Sui Usufono mo Gagaemauga Nu.2 e Faamaonia ai lana Tuuaiga e faasaga i le Matagaluega mo Tupe Maua o le aso 20 Iuni 2013.
3. P.P.2014/2015 Nu.58, Lipoti a le Komiti o Mataupu tau Faamasinoga, Leoleo & Falepuipui ma Faamasinoga o Fanua ma Suafa i le P.P.2013/2014 Nu.78 & P.P.2013/2014 Nu.79, Lipoti Faaletausaga Matagaluega o Leoleo ma Falepuipui Tausaga Faaletupe 2007-2008 ma le Lipoti Faaletausaga Matagaluega o Leoleo ma Falepuipui Tausaga Faaletupe 2008-2009.

FOFOGA FETALAI: Ia ou te ofo alofa atu ma faatalofa atu i le paia ma le mamalu o le tatou Palemene i leni taeao fou, faafetai i le alofa ma le agalelei o lo tatou Tapaau sili i le lagi ua tatou toe potopoto ua ao nuu potopoto i leni aso. Sa tatou faaaaogagase i le po anapo, ia ona o le taumafai lava aua le talitonuga ma le faamoemoe ina ia vave ona faaumaina le tatou Tala o le Tupe ae se i gaoioi lo tatou Malo aua le faatinoina o atinae o le tatou atunuu. Peitai i leni taeao faafetai i le Atua, ua leai lava se mala e afe, o lea e maitau atu ua toe atoatoa mai nofoa o sui usufono, masalo o nisi ua toetiiti taunuu mai.

A o leni taeao i le tulaga aloaia, ou te faatalofa atu ma faafeiloai atu, o le mea sili ma le taua ua tatou toe potopoto i Tiafau o lo tatou Maota e faatino ai lo tatou valaauina aua le filifiliga a Samoa. Ia leni aso e manatu o le aso puupuu, o lea foi ua taumafai atu le Ofisa o le Fono ma au nei, ina ia faapolokalameina ni Tulafono ma ni polokalame i Lipoti ma mea uma e faatino ai leni aso, ia ona faapena lea ona tatou toe logopuialii aua Taulumaga o le tatou Fono mo le vaiaso fou.

Ae alo maia lo tatou Maota, e talitonu le faamoemoe o le a faasolo le tatou galuega, tau ina ia alofagia e le Atua polokalame uma o le a tatou feagai i leni aso.

**TULAFONO TAU FAAOFI O TEUTEUGA O LE FAAVAE
(NU. 2) 2014 – faitauga muamua**

FOFOGA FETALAI: Tulai mai lau Afioga i le Palemia.

Susuga Hon TUILAEPA FATIALOFA LUPESOLIAI AIONO NEIOTI SAILELE MALIELEGAOI: Lau Afioga i le Fofoga Fetalai ou te tulai atu ma le agaga faaaloalo, e momoli atu le faafetai ma le faamalo i lau Afioga ae faapea foi le mamalu o sui usufono mamalu o le Maota. I le tulai mai i lenei taeao o le tatou Fonousu, ae o lo o maitau o lo o maualuga pea le aoina o le masina i lo outou soifua ma so matou ola e viia ai pea lo tatou Matai sili.

Ou te tulai atu lau Afioga e faatu le lafo, *Ina ia faitauina le Tulafono Tau Faaofi taua tele lenei ua leva ona tauanau mai e outou o le mamalu o le Maota e aumai, o Teuteuga o le Faavae (Nu. 2) 2014 i lona faitauga muamua.*

Faaluaina e le Sui Palemia, Minisita mo Galuega Tau Alamanuia ma Atinae a le Malo, ma le Minisita mo Tina ma Tamaitai, Atinae o Nuu ma Afioga ma Agafesootai.

Na faamaonia le lafo ma faitauina le Tulafono Tau Faaofi i lona faitauga muamua.

FOFOGA FETALAI: E tusa ai ma le Tulafono Tumau o le a faatulaga le Tulafono Tau Faaofi i lona faitauga faalua i le aso Fono lona tolu e mulimuli mai.

**TULAFONO TAU FAAOFI O TEUTEUGA O LE TULAFONO O
FAAMALUMALUGA E FAAMAU AI MEATOTINO TAU LE
TAGATA LAVA IA 2014 – faitauga muamua**

FOFOGA FETALAI: Tulai mai lau Afioga i le Minisita mo Pisinisi, Alamanuia ma Leipa, lau Afioga i le Sui Palemia.

Tofa Hon FONOTOE NUAFESILI PIERRE LAUOFO (Sui Palemia, Minisita mo Pisinisi, Alamanuia ma Leipa): Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Faamalumaluga e Faamau ai Meatotino Tau Le Tagata Lava Ia 2014 i lona faitauga muamua.*

Faaluaina e le Minisita mo Galuega Tau Alamanuia ma Atinae a le Malo, ma le Minisita mo Tina ma Tamaitai, Atinae o Nuu ma Afioga ma Agafesootai.

Na faamaonia le lafo ma faitauina le Tulafono Tau Faaofi i lona faitauga muamua.

FOFOGA FETALAI: E tusa ai ma le Tulafono Tumau o le a faatulaga le Tulafono Tau Faaofi lenei mo lona faitauga faalua i le aso Fono lona tolu e mulimuli mai.

TULAFONO TAU FAAOFI O TEUTEUGA O LE TULAFONO O ASO MALOLO MO TAGATA UMA 2014 – faitauga muamua

FOFOGA FETALAI: Tulai mai lau Afioga i le Sui Palemia.

Tofa Hon FONOTOE NUAFESILI PIERRE LAUOFO: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Aso Malolo mo Tagata Uma 2014 i lona faitauga muamua.*

Faalua e le Minisita mo Tina ma Tamaitai, Atinae o Nuu ma Afioga ma Agafesootai.

Na faamaonia le lafo ma faitauina le Tulafono Tau Faaofi i lona faitauga muamua.

FOFOGA FETALAI: E tusa ai ma le Tulafono Tumau, o le a faatulaga le Tulafono Tau Faaofi mo lona faitauga faalua i le aso Fono lona tolu e mulimuli mai.

ILOILOGA O PEPA

P.P. 2014/2015 NU. 19, TALI ATU A LE MALO I LE P.P.2013/2014 NU.31, LIPOTI A LE KOMITI O TUPE MAUA MA TUPE TOTOGI I LE P.P. 2012/2013 NU. 41, LIPOTI FAALETAUSAGA A LE PULEGA O TUPE FAAVA O MALO A SAMOA MO LE TAUSAGA FAALETUPE FAAIUINA ASO 30 IUNI 2011

FOFOGA FETALAI: Tulai mai lau Afioga i le Minisita o Tupe, lau Afioga i le Palemia.

Susuga Hon TUILAEPFA FATIALOFA LUPESOLIAI AIONO NEIOTI SAILELE MALIELEGAOI: Lau Afioga i le Fofoga Fetalai, ou te faatu le lafo, *Ina ia faamaonia e lenei Fono Aoa le P.P.2014/2015 Nu. 19, o lo o tuuina atu ai Tali a le tatou Malo, i le P.P. 2013/2014 Nu. 31, Lipoti a le Komiti o Tupe Maua ma Tupe Totogi i le P.P. 2012/2013 Nu. 41, Lipoti Faaletausaga a le Pulega o Tupe Faava o Malo a Samoa mo le Tausaga Faaletupe Faaiiuna aso 30 Iuni 2011, e tusa ai ma le Tulafono Tumau 54.*

Faalua e le Sui Palemia, Minisita mo Galuega Tau Alamanuia ma Atinae a le Malo, ma le Minisita mo Tina ma Tamaitai, Atinae o Nuu ma Afioga ma Agafesootai.

FOFOGA FETALAI: Se i tulai mai lau Afioga i le Minisita o Tupe.

Susuga Hon TUILAEPFA FATIALOFA LUPESOLIAI AIONO NEIOTI SAILELE MALIELEGAOI: Lau Afioga i le Fofoga Fetalai, mo le silafia e le Maota atoa ma le faafogafoga a le tatou atunuu, ou te tuuina atu Tali nei e tusa ai ma lenei Pepa: E tusa ai ma fautuaga a le Komiti o Tupe Maua ma Tupe Totogi i le P.P. 2012/2013 e faatatau i le Lipoti a le tatou Pulega o lo o taua i luga, e faailoa atu ma le agaga maualalo e faapea:

TALI ATU A LE MALO I LE LIPOTI A LE KOMITI O TUPE MAUA MA TUPE TOTOGI I LE P.P. 2012/2013 NU. 41, LIPOTI FAALETAUSAGA A LE PULEGA O TUPE FAAVA O MALO A SAMOA MO LE TAUSAGA FAALETUPE FAAIUINA ASO 30 IUNI 2011.

Fautuaga 1:

Ia silasila i ni auala e mafai ai ona fesoasoani atu ai le Pulega ma le Malo i le faatosina mai o kamupani ma Faalapotopotoga mai atunuu i fafo e faaogaina le auaunaga a le Pulega o Tupe Faava o Malo a Samoa.

Ua ou faatauaina le fesili lea leaga e na o le pau lava le mea lea e fai mai o Kamupani ma Faalapotopotoga mai fafo, o lona uiga, e aofia uma ai lava atunuu uma o le lalolagi e le o faasau ai ia Asia.

Tali:

O se manatu autu i sini ma faamoemoega a le tatou Pulega, o le manaoga faifaipea lea e atinaeina ana auauna eseese e tusa ai ma laasaga tau pisinisi faava o malo i nei foi ituaiga pisinisi, ina ia tumau lona tulaga e faatauva, lea o lo o uunaia pea e le Malo, aemaise le tosina mai o kamupani mai fafo. Ona o lea la itu, o lea o lo o vaavaai totoa pea i ai le SIFA i auaunaga tau pisinisi eseese ma fou mo mavaega faapea ni faiga eseese mo le puipuiga o aseta a le aufaipisinisi mai fafo. E fai ma faataitaiga o le Tulafono Tau Faaofi o Mavaega lea faatoa uma nei lava ona pasi atu e le tatou Palemene ae ua silia i le lua tausaga o soalaupuleina pea.

O lo o i ai foi se Tulafono o lo o tusia i le taimi nei mo se tasi Tulafono fou (foundations law) e faaopoopo i auaunaga resitala a le SIFA. E ese mai i le faalauteleina o ana auaunaga, o lo o faatino foi ia isi fuafuaga mamao lava le vaai mo le maketiina po o le faalauteleina atu lea e faatosinaina mai ai ni pisinisi e lesitala i a tatou taumafaiga nei, e tosina mai ai ni pisinisi iloga e faatutuina i totonu o Samoa, ma e moomia ai le siosiomaga lelei, siosiomaga foi lea e atili ai ona fia aumai ni pisinisi e faatuina faapenei i totonu o Samoa.

O lo o uunaia le faalauiloa o nei foi auaunaga tau pisinisi o le SIFA i le tulaga faifaipea e auala lea o fonotaga ia e faifaipea i Asia ma Amerika i atunuu ia i Saute i se vai tau talu ai nei, aemaise lava i ni lomiga ma ni faamatalaga faalauiloa i le lalolagi atoa.

Fautuaga 2:

Ia silasila totoa foi le Pulega ia faamautu pea ma faamausaili le saogalemu o Samoa mai le faaofi mai o ni tupe foi lea tatou te faapuina o tupe eleelea po o tupe e maua ma ii soligatulafono e pei o tupe a tagata e deal in drugs ma fualaa faasaina.

Tali:

O lo o galulue soosootau pea le Pulega ma le Pulega o Puipuiga i tupe e faaofiina mai faasolitulafono lea e taua i le gagana faa-Peretania o Money Laundering Prevention Authority i le mataituina o faiga faavae lelei faava o Malo, aemaise o le avea lea o le Pulega ma sui aloaia o se Soa Komiti o lo o tagofia mataupu uma nei tau tupe e faaofi mai faasolitulafono mo le faatupeina o faiga faatupu faalavelave.

Fautuaga 3:

Ia tausisia aiaiga faaetulafono mo le tuuina mai o Lipoti faaletausaga a le Pulega i le maea o tausaga faaetupe taitasi mo iloiloga a le Palemene.

Tali:

E faamanatu atu i le mamalu o Komiti, talu ai o le tuai ona tuuina atu aloaia o Lipoti Faaletausaga mo tausaga taitasi, o le taimi nei ua maea ona tuu atu le Lipoti Faaletausaga o le 2012, ae mo le tausaga lea na tea atu nei ua maea ona faamaonia e le Suetusi tutoatasi lea o Lesa ma Penn faamatalaga tau tupe, a o le a tau faamaea le tuufaatasiga o Lipoti Faaletausaga i lona atoatoaga.

E momoli atu ai i lau Afioga i le Minisita le faafetai tele a le Pulega, o le faafetai o lea e aumai ia te au, ae e leai se mea tou te tau faalogo mai ai fua i ai.

Lau Afioga i le Fofoga Fetalai o le tali atu lena. O le taua o tali nei ona o le Faalapotopotoga lenei e pei ona faatuina, o lea ou te tau tomanatu o le tausaga e 1992 na faatu aloaia ai. O le isi lea Faalapotopotoga o lo o saili tupe mo lo tatou atunuu ma o lea e faatupe ai foi Tala o Tupe a le Malo i le tele o tausaga ma e masani ona alu a latou malaga e feiloai ai ma le aufaipisinisi, ma e masani lava ona tupu i taimi e taaalo ai le Taitoa 7 i Hong Kong ma isi foi atunuu e o atu i ai. Ona o le taimi lea e toatele naunau le aufaipisinisi e o atu e matamata ai i le Manu Samoa. O le taimi lena e o atu ai, ae tatou o atu foi tatou tapa i a tatou faasalalauga faatosina e faia i totonu o Hong Kong, ma isi capitals lea e fai ai a tatou faasalalauga faatosina.

Lau Afioga i le Fofoga Fetalai, o le tali atu lena a le Malo.

Na tuuina atu le Fesili ma ina ua manumalo le Ioe, na tulai loa Tali Atu a le Malo i le P.P.2013/2014 Nu.31, Lipoti a le Komiti o Tupe Maua ma Tupe Totogi i le P.P.2012/2013 Nu.41, Lipoti Faaletausaga a le Pulega o Tupe

Faava o Malo a Samoa mo le tausaga faaletupe faaiiina aso 30 Iuni 2011 ua faamaonia.

P.P.2014/2015 NU.20, TALI ATU A LE MALO I LE P.P.2013/2014 NU.32, LIPOTI A LE KOMITI O TUPE MAUA MA TUPE TOTOGI I LE P.P.2011/2012 NU.95, LIPOTI FAALETAUSAGA A LE FAALAPOTOPOTOGA INISIUA TAU SOIFUA A SAMOA MO LE TAUSAGA FAALETUPE 2010/2011

FOFOGA FETALAI: Tulai mai lau Afioga i le Palemia, o le Minisita foi lea o Tupe.

Susuga Hon TUILAEPFA FATIALOFA LUPESOLIAI AIONO NEIOTI SAILELE MALIELEGAOI: Lau Afioga i le Fofoga Fetalai, ou te faatu le lafo, *Ina ia faamaonia e lenei Fono Aoa le P.P.2014/2015 Nu.20 o lo o tuuina atu ai Tali a le tatou Malo o lo o i totonu o le P.P.2013/2014 Nu.32, Lipoti a le Komiti o Tupe Maua ma Tupe Totogi i le P.P.2011/2012 Nu.95, Lipoti Faaletausaga a le Faalapotopotoga Inisiua Tau Soifua a Samoa mo le Tausaga Faaletupe 2010/2011 e tusa ai ma le Tulafono Tumau 54.*

Faaluaina e le Sui Palemia, Minisita mo Atinae ma Pisinisi, Minisita mo Tina ma Tamaitai, Atinae o Nuu ma Afioga ma Agafesootai ma le Minisita mo Faatoaga ma Faigafaiva.

FOFOGA FETALAI: Ia, toe tulai mai lau Afioga i le Minisita mo le faitauga o le Tali.

Susuga Hon TUILAEPFA FATIALOFA LUPESOLIAI AIONO NEIOTI SAILELE MALIELEGAOI: Lau Afioga i le Fofoga Fetalai, e tusa ai ma le Lipoti a le Palemene ua ou taua ma fautuaga ua tuuina mai e uiga i le Lipoti Faaletausaga a le Faalapotopotoga Inisiua Tau Soifua a Samoa mo le Tausaga Faaletupe 2010/2011, ua tuuina mai nei tali e tusa ai o fautuaga a le Komiti.

“TALI ATU I LE P.P.2011/2012 NU.95, LIPOTI FAALETAUSAGA A LE FAALAPOTOPOTOGA INISIUA TAU SOIFUA A SAMOA MO LE TAUSAGA FAALETUPE 2010/2011.

Fautuaga 1:

Ina ia faatinoina ma uunaia malosi polokalame faalauiloa a le Faalapotopotoga e faailoa ai i le atunuu lautele le taua o le faia o Inisiua Tau Soifua aemaise lava i so o se tagata faigaluega ma totogi ana premiums.

Tali:

O lo o faatino pea polokalame faalauiloa a le vaega o le Maketi a le Faalapotopotoga i luga o leitio, nusipepa ma TV mo le silafia e le atunuu lautele o auunaga eseese ma ituaiga inisiua eseese a le Faalapotopotoga, e faaopoopo lea i le galuega a i latou ua faapitoa lo latou tomai i le faatalalanoaina o mataupu tau Inisiua i tagata faigaluega a le Malo ma pisinisi faapea tagata taitoatasi i tua.

Fautuaga 2:

Ina ia faailoa ma uunaia malosi e le Faalapotopotoga o Inisiua Tau Soifua i le atunuu lautele le taua tele o le tausisia ma faatumauiina pea lea o le teuina o saofaga tau inisiua ina ia agavaa ai i faamanuiaga ma ponesi tau seleni e maua i le vaitaimi e matua (mature) ai saofaga mo le talaina i tua e Sui-faisaofaga.

Tali:

E matua taua tele le malamalama lelei o sui faisaofoaga i le aoga o le faia o se inisiua i totonu o le Faalapotopotoga Inisiua Tau Soifua a Samoa. E tatau foi ona uunaia malosi le aufai saofaga ina ia taofiofi a latou inisiua seia matua (mature). O lona uiga se i oo i le taimi faatapulaa e tala ai i tua ina agavaa ai i le anoanoai o faamanuiaga eseese pe a faatino le faamoemoe lea faatasi ai ma ponesi, ma ia taofiofi a latou inisiua mai le vave talaina i tua ae le i oo i le taimi e tatau ai.

O le vaega i totonu o le Faalapotopotoga o lo o nafa lea ma le faamaopoopoina o inisiua o lo o feagai lea ma le taofiofiina lea o inisiua mai le vave ona toesea lea mai tusi, ua faaaupegaina lea i tagata faigaluega ua i ai le tomai faapitoa ma agavaa e galulue ai i le vaega.

E tatau foi ona galulue faatasi tagata faigaluega uma a le Malo i le aoina faatasi mai lea o tupe totogi mai totogi o le au faigaluega. O se auala e fesoasoani ai i sui faisaofoaga ma faatumauiina ai le faaauauina lea o le totogiina o inisiua seia oo i le taimi e tatau ona tala ai i tua. Ua maitauina foi nisi o le Faalapotopotoga a le Malo ua faamuta lea auaunaga o le toe tipiina lea o inisiua mai totogi o ana tagata faigaluega ma ua avea ma mafuaaga ua faamuta ai feagaiga o a latou Inisiua.

Fautuaga 3:

Ina ia silasila le Pulega ma le Komiti Faafaoe mo le faalautele atu o ana auaunaga i le faatinoina lea o isi ituaiga Inisiua e ese mai i Inisiua Tau Soifua e pei ona faatinoina ai le auaunaga a le Faalapotopotoga.

Tali:

O le a vaavaai totoa i ai le Pulega ma le Komiti Faafaoe i nisi o ituaiga Inisiua e ese mai le vaega o mafai ona faatino i lalo o le Tulafono a le Faalapotopotoga Inisiua Tau Soifua 1976, aua le faalauteleina o le auaunaga i le mamalu o le atunuu mo le faaleleia atili o le soifua lautele o le atunuu ma ona tagata.”

Lau Afioga i le Fofoga Fetalai, o le tali atu lena e tusa ai ma manaoga o le Komiti.

Na tuuina atu le Fesili ma ina ua manumalo le Ioe, na tulai loa Tali Atu a le Malo i le P.P.2013/2014 Nu.32, Lipoti a le Komiti o Tupe Maua ma Tupe Totogi i le P.P.2011/2012 Nu.95, Lipoti Faaletausaga a le Faalapotopotoga

Inisiua Tau Soifua a Samoa mo le tausaga faaletupe 2010/2011 ua faamaonia.

P.P.2014/2015 NU.21, TALI ATU A LE MALO I LE P.P.2013/2014 NU.83, LIPOTI A LE KOMITI O FAAFOEGA TAU PULEGA A LE MALO I LE P.P.2013/2014 NU.3, LIPOTI FAALETAUSAGA A LE KAMUPANI O PULEGA A LE FAAPUTUGATUPE TEU FAAFAIGALUEGA O MAVAEGA TAUSI A SAMOA MO LE TAUSAGA FAAIUINA ASO 30 IUNI 2012

FOFOGA FETALAI: Ia, tulai mai lau Afioga i le Minisita o Tupe.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, ou te faatu le lafo, *Ina ia faamaonia e lenei Fono Aoao le P.P.2014/2015 Nu.21, o lo o tuuina atu ai Tali a le tatou Malo i le P.P.2013/2014 Nu.83, Lipoti a le Komiti o Faafoga Tau Pulega a le Malo i le P.P.2013/2014 Nu.3, Lipoti Faaletausaga a le Kamupani o Pulega a le Faaputugatupe Teufaafaigaluega o Mavaega Tausi a Samoa mo le Tausaga Faaiuina Aso 30 Iuni 2012, e tusa ai ma le Tulafono Tumau 54.*

Faaluaina e le Sui Palemia, Minisita mo Tina ma Tamaitai, Atinae o Nuu ma Afioga ma Agafesootai ma le Minisita mo Faatoaga ma Faigafaiva.

FOFOGA FETALAI: Ia, toe tulai mai lau Afioga i le Minisita mo le tolaulauina o le tali lau Afioga i le Palemia.

Susuga Hon TUILAEPA FATIALOFA LUPESOLIAI AIONO NEIOTI SAILELE MALIELEGAOI: Lau Afioga, ua fai sina pupuu tele o nei Lipoti, ua le uma le malosi na koloni mai anapo e tau mai i lenei taeao ina ia uma atu Lipoti nei, a o lea ua ou vaai atu ua tautulemoe mai Palu.

“TALI ATU A LE MALO I LE P.P.2013/2014 NU.83, LIPOTI A LE KOMITI O FAAFOEGA TAU PULEGA A LE MALO I LE P.P.2013/2014 NU.3, LIPOTI FAALETAUSAGA A LE KAMUPANI O PULEGA A LE FAAPUTUGATUPE TEUFAAFAIGALUEGA O MAVAEGA TAUSI A SAMOA MO LE TAUSAGA FAAIUINA ASO 30 IUNI 2012.

Lau Afioga i le Fofoga Fetalai, ua maea ona Iloilo e le Pulega le Lipoti a Komiti o le Palemene e uiga i le Lipoti Faaletausaga a le Kamupani o Pulega a le Faaputugatupe Teu Faafaigaluega o Mavaega Tausi a Samoa e pei ona faaoo mai i le matou Ofisa i le aso 31 Mati 2014.

E fia tuuina atu ai ni tali a le Pulega i fautuaga a le Komiti a le Palemene e pei ona tuuina mai i le Vaega 8 o le Lipoti. O nei tali o lo o auiliili atu i lalo:

1. Ua faamauina e le Pulega le fautuaga mo le sailia o se nofoaga talafeagai e siitia i ai le Kamupani. Peitai mo lenei taimi, o lo o

taumafai pea le Kamupani ina ia tau faasaoina ana vaegatupe ina ia maua ni ana tupe faasili e pei ona aiaia i lalo o le Tulafono mo Faalapotopotoga a le Malo 2001. I le taimi nei, o lo o faaaogaina e le Kamupani ile Vaega Tau Information Technology (IT) a le Matagaluega o Tupe faatasi ai ma le server a le Matagaluega. Ua faia lea tulaga ona e le o tele ni vaegatupe a le Kamupani i le taimi nei e faatau ai sana ia lava server faapea ma le totogiina o ni tagata faigaluega faaopoopo mo sana ia lava Vaega Tau IT. O le fuafuaga lava ua i ai o le faatalitali i le fale fouj a le Matagalujega o Tupe o lo o fuafuaina e fausia, ona sii atu ai lea o le Kamupani i lea nofoaga.

2. E lagolagoina ma talia e le Pulega le fautuaga mo le faaauau pea o polokalame faalauiloa ma fuafuaga mo le tosina mai o le mamalu o le atunuu o lo o alaala ma papaaao i atunuu i fafo atu o Samoa.
3. E lagolagoina ma talia le fautuaga ina ia tulaia ma le faautauta le silasila a le Pulega ma le Komiti Faafoe, i atinae talafeagai ma le manuia e faipaaga atu i ai aua le faafaigaluegaina ai o tupe a le Kamupani.

I lona aotelega, e talitonu le Pulega o lo o talafeagai le Lipoti i le tulaga sa i ai le Kamupani o Pulega ma le Mavaega Tausi i le tausaga faaletupe o lo o iloiloaina e le Komiti a le Palemene. E fia faamau le agaga faafetai i le Taitaifono ma sui o le Komiti a le Palemene i le galuega ua faatinoina.”

Lau Afioga i le Fofoga Fetalai, o le tatou Lipoti lena mai le Pulega o le Faaputugatupe a Mavaega Tausi. Ia manatua foi o le faaputugatupe lena e faapitoa lava ina ia mafai ona o atu i ai o tatou tagata e teu ai a latou tupe e fia teu e mafai ai ona latou umia ni sea i ni Kamupani o lo o fia faatuina e tele tupe e maua mai ai. E tau mai i le taimi lea, peiseai na o latou lava e maoae lo latou tamaoaiga e mafai ona faatau motu ni o latou sea, ua leva ona fuafua e le Malo lena, masalo po o le 40 tausaga talu ai na amata talanoa ai le Faalapotopotoga lena, ae faatoa mafai nei ona faatu. Na amatamea i le faatauina o sea a le Kamupani foi lea a tatou le SamoaTel, lea faatoa faatino ai le faamoemoe lea i le 2011 i luga o le faatonuga a le Kapeneta, a leai se Kamupani lea, e leai foi se faamatuu atu i tua o le SamoaTel ona o le isi lea Kamupani e maua tupe, ua tataua ona amata ai loa le tatou Kamupani lea o Mavaega, e fesoasoani ai i nai o tatou tagatanuu e umia ni sea e tele o atinae e mafai ona fai, e aofia ai le aufaipisinisi lapopoa. Lau Afioga i le Fofoga Fetalai, o le tali atu lena e tusa o le Lipoti lena.

Na tuuina atu le Fesili ma ina ua manumalo le Ioe, na tulai loa Tali Atu a le Malo i le P.P.2013/2014 Nu.83, Lipoti a le Komiti o Faafoega Tau Pulega a le Malo i le P.P.2013/2014 Nu.3, Lipoti Faaletausaga a le Kamupani o Pulega a le Faaputugatupe Teu Faafaigaluega o Mavaega Tausi a Samoa mo le tausaga faaiiina aso 30 Iuni 2012 ua faamaonia.

**P.P.2014/2015 NU.22, TALI ATU A LE MALO I LE P.P.2013/2014
NU.84, LIPOTI A LE KOMITI O FAAFOEGA TAU PULEGA A LE
MALO I LE P.P.2012/2013 NU.44, FAAMATALAGA O SINI AUTASI
A LE KAMUPANI O PULEGA A LE FAAPUTUGATUPE TEU
FAAFAIGALUEGA O MAVAEWA TAUSI A SAMOA MO TAUSAGA
2013-2015**

FOFOGA FETALAI: Tulai mai lau Afioga i le Minisita o Tupe po o lau Afioga i le Palemia.

**Susuga Hon TUILAEPFA FATIALOFA LUPESOLIAI AIONO NEIOTI
SAILELE MALIELEGAOI:** Lau Afioga i le Fofoga Fetalai, ou te faatu le lafo, *Ina ia faamaonia e lenei Fono Aoa le P.P.2014/2015 Nu.22, o lo o tuuina atu ai Tali a le Malo i le P.P.2013/2014, Lipoti a le Komiti o Faafoga Tau Pulega a le Malo i le P.P.2012/2013 Nu.44, Faamatalaga o Sini Autasi a le Kamupani o Pulega a le Faaputugatupe Teufaafagaluega o Mavaega Tausi a Samoa mo tausaga 2013-2015.*

Faaluaina e le Sui Palemia, Minisita mo Tupe Maua, Minisita mo Tina ma Tamaitai, Atinae o Nuu ma Afioga ma Agafesootai, ma le Minisita mo Faatoaga ma Faigafaiva.

FOFOGA FETALAI: Ia, tulai mai lau Afioga i le Minisita e tolaulau le Tali.

**Susuga Hon TUILAEPFA FATIALOFA LUPESOLIAI AIONO NEIOTI
SAILELE MALIELEGAOI:** Lau Afioga i le Fofoga Fetalai, e tasi lea tulaga maoae, ua oo i le 2015 le Lipoti ae o lea tatou te le i oo i a

**“TALI ATU A LE MALO I LE P.P.2013/2014 NU.84, LIPOTI A LE
KOMITI O FAAFOEGA TAU PULEGA A LE MALO I LE
P.P.2012/2013 NU.44, FAAMATALAGA O SINI AUTASI A LE
KAMUPANI O PULEGA A LE FAAPUTUGATUPE TEU
FAAFAIGALUEGA O MAVAEWA TAUSI A SAMOA MO
TAUSAGA 2013-2015.**

Ua maea ona Iloilo e le Pulega le Lipoti a le Komiti o le Palemene e uiga i le Famatalaga o Sini Autasi a le Kamupani o Pulega a le Faaputugatupe Teufaafagaluega o Mavaega Tausi a Samoa mo Tausaga 2013-2015 e pei ona faaoo mai e Lau Afioga i le matou Ofisa i le aso 3 Aperila 2014. O le tusi mai lea ia te au.

E taliaina ma lagolagoina uma e le Pulega fautuaga a le Komiti o le Palemene e pei ona tuuina mai le Vaega 8 o le Lipoti.

E fia faamau le agaga faafetai tele a le Ofisa nei mo Lau Afioga i le lagolagosua i galuega faatino ua ausia e le Ofisa i tausaga e e tolu ua mavae atu. O le tele o fuafuaga e pei ona faataatitia i totonu o lenei Fuafuaga Autasi ua ausia a o lea e le i maea le piliota 2013-2015, se i vagana ai fuafuaga mo se pepe fou pe a tusa ai ma tulaga tau tupe a le Ofisa.”

Lau Afioga, o le tali atu lena e tusa o lenei foi Lipoti.

Afioga Hon Palusalue Faapo II: Lau Afioga i le Fofoga Fetalai, se i fai sina upu, talofa i si alii Palemia ua alu lenei taeao.

FOFOGA FETALAI: O le a le upu Palusalue?

Afioga Hon Palusalue Faapo II. E leai e tusa ai ma le tali mai a le Malo. E i ai lava nai au fesili ia e fia fai atu.

FOFOGA FETALAI: E faamalulu atu e leai se felafolafoaiga i lalo o le tatou Tulafono Tumau i lalo o le process lea o tali mai a le tatou Malo. E leai se faatagaga o se tulaga o se felafolafoaiga, o le tali a le Malo, o le tali foi lena e tuuina mai e ala i le tuuina mai o la outou Lipoti agai i le Malo. O tulaga na o lea e i lalo o le tatou Tulafono Tumau. E faamalulu atu ai i lau Afioga i le Taitai o le Itu Agai.

Na tuuina atu le Fesili ma ina ua manumalo le Ioe, na tulai loa Tali Atu a le Malo i le P.P.2013/2014 Nu.84, Lipoti a le Komiti o Faafoega Tau Pulega a le Malo i le P.P.2012/2013 Nu.44, Faamatalaga o Sini Autasi a le Kamupani o Pulega a le Faaputugatupe Teu Faafaigaluega o Mavaega Tausi a Samoa mo tausaga 2013-2015 ua faamaonia.

Afioga Hon Palusalue Faapo II: Lau Afioga i le Fofoga Fetalai, o se mea lava e fia malamalama ai, aua o Lipoti nei ma Tali a le Malo, e i ai lava lou talitonuga e tatau ona tatala le avanoa i le mamalu o le Palemene e fai ai ni o latou taofi. O fea la le Tulafono Tumau lea e faasaina ai felafolafoaiga?

FOFOGA FETALAI: Ia o le mea lena sa ou fai atu ai. O lea o le a ou fai atua. Palu, o lea foi ua e tulai mai i lo ta va i lenei taeao o lea faatoa e ala mai. O le Tulafono Tumau 54, faitau lelei, a i ai sou masalosalo ona e toe tu mai lea.

**P.P.2014/2015 NU.26, TALI ATU A LE MALO I LE P.P.2013/2014
NU.106, LIPOTI A LE KOMITI O OLOA GAOSIA TULAGA
MUAMUA, MATAUPU TAU PISINISI, ALAMANUIA MA LEIPA I
LE P.P.2013/2014 NU.5, LIPOTI FAALETAUSAGA A LE FALETUPE
O ATIINAE O SAMOA MO LE TAUSAGA FAALETUPE FAAIUINA
ASO 30 IUNI 2012**

FOFOGA FETALAI: Tulai mai lau Afioga i le Minisita o Tupe.

**Susuga Hon TUILAEPFA FATIALOFA LUPESOLIAI AIONO NEIOTI
SAILELE MALIELEGAOI:** Lau Afioga i le Fofoga Fetalai ou te faatu le lafo, *Ina ia faamaonia e lenei Fono Aoa le P.P.2014/2015 Nu.26, Tali atu a le Malo i le P.P.2013/2014 Nu.106, Lipoti a le Komiti o Oloa Gaosia Tulaga Muamua, Mataupu Tau Pisinisi, Alamanuia ma Leipa i le P.P.2013/2014 Nu.5, Lipoti Faaletausaga a le Faletupe o Atiinae o Samoa*

mo le Tausaga Faaletupe Faauiina aso 30 Iuni 2012 e tusa ai ma le Tulafono Tumau 54.

Faaluaina e le Sui Palemia, Minisita mo Tupe Maua, Minisita mo Galuega Tau Alamanuia ma Atinae a le Malo, Minisita mo Tina ma Tamaitai, Atinae o Nu'u ma Afioga ma Agafesootai ma le Minisita mo Faatoaga ma Faigafaiva.

FOFOGA FETALAI: Tulai mai lau Afioga i le Palemia e saunoa mo le Tali a le Malo.

Susuga Hon TUILAEPFA FATIALOFA LUPESOLIAI AIONO NEIOTI SAILELE MALIELEGAOI: Lau Afioga i le Fofoga Fetalai, o Tali nei e tusa ai ma le Talosaga.

“TALI ATU A LE MALO I LE P.P.2013/2014 NU.106, LIPOTI A LE KOMITI O OLOA GAOSIA TULAGA MUAMUA, MATAUPU TAU PISINISI, ALAMANUIA MA LEIPA I LE P.P.2013/2014 NU.5, LIPOTI FAALETAUSAGA A LE FALETUPE O ATIINAE O SAMOA MO LE TAUSAGA FAALETUPE FAAIUNA ASO 30 IUNI 2012.

Fautuaga a le Komiti:

1. Faatino ni polokalame faalauiloa e fagufagu ai pea i le atunuu ituaiga atinae eseese ma lo latou taua, e mafai ona faatino ai nonogatupe i le Faletupe o Atinae o Samoa.

Tali atu:

O Mati 2014, na maea ai tapenaga mo le toe faaleleia atili o le Upega Tafailagi a le Faletupe o Atinae e faalauiloa ai ana auaunaga eseese tau nonogatupe ma o latou taiala. O le auaunaga faanonogatupe e aofia uma ai atinae o le tamaoaiga e pei o faatoaga, faigafaiva, atinae turisi, atinae faapisinisi ma alamanuia, aoga ma falemai, ma atinae laiti mo tina ma tamaitai. O lo o faaauau pea le faigapaaga a le Faletupe ma Matagaluega o Faatoaga faapea ma le SBEC mo le faatautaia o poloketi uma a le SACEP o lo o faatupeina e le Faletupe o le Lalolagi. O lenei poloketi e toe faaolaina ai atinae tau faatoaga, o lafumanu ma atinae o laau.

Ua faamauina le fautuaga a le Komiti i le faatinoina lea o ni faalauiloa mo galuega uma a le Faletupe o Atinae i itu tau i le auaunaga faanonogatupe. O lea ua tapena ni polokalame faalauiloa e faasalalauina i le Ofisa i Apia ma Savaii aua le silafia o le atunuu lautele.

2. Faaauau pea le galulue faatasi ma le Pulega o Tagata Tafafao Maimoa ma isi Matagaluega ma Faalapotopotoga a le Malo i fautuaga talafeagai e moomia i taimi e iloiloaina ai talosaga mo nonogatupe.

Tali atu:

O lo o faaauauina pea le galulue faatasi a le Faletupe ma le Pulega o Tagata Tafafao Maimoa mai Fafu mo fautuaga talafeagai e tusa ai ma

nonogatupe o lo o tuuina atu atinae turisi e pei o le fesoasoani o le afa o Eveni, ma tapenaga mo le fonotaga i le SIDS ma Taaloga a le Aualavou o le Taupulega a le Commonwealth i le tausaga 2015. O lo o faaauau foi le galulue faatasi o le Faletupe ma isi Matagaluega ma Faalapotopotoga a le Malo mo manatu ma fautuaga e le o mafai ona maua ai le potu masani e fesoasoani i le iloilo ina o talosaga mo nonogatupe o lo o tuuina mai.

3. Tuuina atu le lagolago a le Faletupe e ala i nonogatupe mo le uunaia o atinae tau faatoaga aemaise lava ia i latou o lo o tele le sao i oloa auina atu i fafo. O le taunuuga lelei o lea fuafuaga o le a avea o se sao taua o le Faletupe i le atinaeina o le tamaoaiga o le atunuu, aemaise o le foia ai o le faaaitaui o le faaletonu o le toe totogiina o nonogatupe.

Tali atu:

O lo o faatino pea le lagolago a le Faletupe i atinae o lo o ave i ai le faamuamua a le Malo i le Taiala mo le Atinae o Samoa 2012-2016. O nonogatupe i atinae faatoaga i le taimi nei e tele i atinae laiti i le feoloolo (medium) ae laitiiti se numera mo atinae faatoaga faapisinisi (semi commercial). O le a ave le lagolago a le Faletupe i talosaga mo oloa auina atu i fafo tau faatoaga ina ia faaleleia ai lea vaega o le tamaoaiga. Sa faataunuaina foi se fonotaga ma le Faalapotopotoga a le Women in Business e faatalanoa ai ni auuala e galulue faapaaga ai mo le faaleleia o oloa auina atu i fafo mo faatoaga. O le a fesootai foi le faletupe ma paaga, key stakeholders e gafa ma le uunaia o oloa auina atu i fafo ina ia galulue faatasi e lagolago ma faaleleia atili lena vaega taua o le tamaoaiga. O le vaega lea o le Women in Business, o lo o latou auina atu i Peretania ia suauu virgin oil, suauu ia faapitoa e tapenaina e tusa ma le kuata miliona i le tausaga, o latou foi nei o lo o taulamua i le aveina atu o fua o faaeleleaga lea e le faaogaina ai se vailaau po o ni fetalaisa i le lauelelele. Latou te lauina atu i fafo le uta o fai misiluki e i ai foi taimi o lo o latou faamagoina ai le misiluki pula iinei ma package ma ave i fafo, faatasi ai ma le koko Samoa faapea foi ma le kofe ma le suauu maua mai i le fetau. Ou te matua fautuaina outou le Itu Agai e faatau ni a outou fetau. A uu ai alafau matua molemole ma momosi e pei o le momosi lea sa taua e le Minisita o Tamaitai i le aso ananafi e tatau foi ona faamomosi ia outou ae e le faapea na o tamaitai e faamomosi.

Lau Afioga i le Fofoga Fetalai, o le lipoti matagofie lena a le Faletupe o Atinae, na tapena e le tamaitai Ofisa Sili fou o Susana Lauulu e leai se toalua.

Na tuuina atu le Fesili ma ina ua manumalo le Ioe, na tulai loa Tali Atu a le Malo i le P.P.2013/2014 Nu.106, Lipoti a le Komiti o Oloa Gaosia Tulaga Muamua, Mataupu Tau Pisinisi, Alamanuia ma Leipa i le P.P.2013/2014 Nu.5, Lipoti Faaletausaga a le Faletupe o Atinae a Samoa mo le tausaga faaletupe faaiuina aso 30 Iuni 2012 ua faamaonia.

P.P. 2014/2015 NU. 27. TALI ATU A LE MALO I LE P.P. 2013/2014 NU 95, LIPOTI A LE KOMITI O FAAFOEGA TAU PULEGA A LE MALO I LE P.P. 2013/2014 NU. 77, LIPOTI FAALETAUSAGA A LE OFISA O LE LOIA SILI MO LE TAUSAGA FAALETUPE FAAIUINA ASO 30 IUNI 2012

FOFOGA FETALAI: Toe tulai mai lau Afioga i le Palemia.

Susuga Hon TUILAEPFA FATIALOFA LUPESOLIAI AIONO NEIOTI SAILELE MALIELEGAOI: Ou te tulai atu e faatu le lafo, *Ina ia faamaonia e lenei Fono Aoao le P.P. 2014/2015 Nu 27, o lo o tuuina atu ai Tali a le Malo i le P.P 2013/2014 Nu 95, Lipoti a le Komiti o Faafoega tau Pulega a le Malo i le P.P. 2013/2014 Nu 77, Lipoti faaletausaga a le Ofisa o le Loia Sili mo le Tausaga Faaletupe faaiugaina aso 30 Iuni 2012 e tusa ai ma Tulafono Tumau.*

Faaluaina e le Sui Palemia, Minisita mo Tupe Maua, Minisita mo Galuega Tau Alamanuia ma Atinae a le Malo, Minisita mo Tina ma Tamaitai, Atinae o Nuu, Afioga ma Agafesootai ma le Minisita mo Faatoaga, Faleoloa o Faatoaga ma Faigafaiva.

FOFOGA FETALAI: Toe tulai mai lau Afioga i le Minisita mo le tali atu.

Susuga Hon TUILAEPFA FATIALOFA LUPESOLIAI AIONO NEIOTI SAILELE MALIELEGAOI: Lau Afioga i le Fofoga Fetalai ma le faafofogaaga a le atunuu, ou te faitauina Tali o lo o tuuina atu i lenei Pepa e faapea:

TALI ATU MO LE MALO ILE P.P. 2013/2014 NU. 95, LIPOTI A LE KOMITI O FAAFOEGA TAU PULEGA A LE MALO I LE P.P. 2013/2014 NU. 77, LIPOTI FAALETAUSAGA A LE OFISA O LE LOIA SILI MO LE TAUSAGA FAALETUPE FAAIUINA ASO 30 IUNI 2012.

O le Aso Lulu, 7 Me 2014 na taulimaina ai e lo'u Ofisa le Lipoti a le Komiti o le Palemene o le aso 28 Aperika 2014 e faatatau i le Lipoti Faale-tausaga a le Ofisa o le Loia Sili mo le tausaga faaletupe 2011 i le 2012.

E tusa ai ma aiaiga o le Tulafono Tumau 54 o le Maota e pei ona folasia i le lipoti, o lea e fiafia e tuuina atu ni tali a lou Ofisa i fautuaga a le Komiti a le Palemene e pei ona tuuina mai i le vaega 7 o le Lipoti. E lua vaega o lo o fautuaina mai e le Komiti ma e tali atu faapenei.

1. Ua faamauina le fautuaga muamua ma e faailoa atu ua maea tuuina atu le talosaga a lou Ofisa i le Kapeneta mo le toe faatulagaina o totogi ma avanoa mo le aufaigaluega. Sa taulimaina e le Ofisa o le Kapeneta lea talosaga i le aso 20 Fepuari 2014 ma o lo o talia nei se faaiuga a le Kapeneta mo lea talosaga.

2. O le fautuaga 2 ua faamauina ma e fia faailoa atu foi o lea ua maea soalaupule lenei mataupu ma ua faia le faaiuga o le a faasee atu le Lala o Tulafono ma le Amiotonu i lalo o le Matagaluega o Faamasinoga ma Auaunaga Tau Faamasinoga i le aulia ai o le tausaga faaletupe fou 2014/2015 ia Iulai 2014.

O le tali atu lea i fautuaga e pei ona aumai i le Lipoti a le Komiti a le Palemene. E avea foi lenei avanoa e fia faaleo ai le agaga faafetai i le Taitaifono ma sui mamalu o le Komiti a le Palemene i le galuega ua maea faatino.

O le tulaga e pei ona taua ua uma ona vaavaai i ai le Kapeneta i le Lipoti lea ona sa tapa isi Lipoti aemaise lava le Lipoti mai le vaega tonu lea o le itutino o lo o nafa ma totogi. O uiga ia faa-Kapeneta, e oo loa i mataupu tau totogi ona tapa loa lea o Lipoti uma lava e tatau ona i ai, Lipoti o le Tupe i le tulaga o le lava o le tupe. O le Matagaluega a le PSC i le tulaga talafeagai ai o le vasaga o totogi o lo o faatulaga ma totogi o le afaigaluega lautele. Ia ma le vaega foi la lea o le Tribunal ina ia vaai foi i latou ma aumai le fautuaga i le Kapeneta i le vasaga o totogi. Ua fautuaina mai ma totogi foi o le vaega lautele o le service.

O lea faiga ia taumafai pea ia i ai se vasaga lelei e taoto ai totogi ona o nei lava mea o totogi e faatupu faalavelave ona o le tulaga lenei, e leai lava se isi o le lalolagi lenei o le afaigaluega a le Malo e manatu ua lava le totogi. E manatu uma lava tagata e le lava o latou totogi. E leai lava se mea e ese ai ma le finau lea e finau soo mai ai Palu, ua maualuga tele le tau o totogi fuapau i le falemai. E tiga ona sene ae maualuga lava, ona o le mea lea na faatoa maualalo ai o le matua leai lava o se mea e totogia.

E faapena foi i mea nei o totogi o le natura lea o le soifua, pe \$2miliona le totogi o le tagata e le lava lava, a totogi i ai le \$2miliona ae finau e toe avatu se isi \$2miliona. O le uiga lea faale-tagata ae le Kapeneta le aia e silasila totoa ai i vaega uma lava o le service ina ia tau ai se tulaga vasaga ina ia aua nei maoae le tele o le totogi o le isi ae maualalo le totogi o le isi. E tusa lava pe faapea ua see ese ma le pulega a le PSC.

Lau Afioga i le Fofoga Fetalai, o le tali puupuu atu lava e uiga i lenei foi mataupu sa talosagaina ai se Lipoti a le Loia Sili.

Na tuuina atu le Fesili ma ina ua manumalo le Ioe, na tulai loa Tali Atu a le Malo i le P.P.2013/2014 Nu.95, Lipoti a le Komiti o Faafuaga Tau Pulega a le Malo i le P.P.2013/2014 Nu.77, Lipoti Faaletausaga a le Ofisa o le Loia Sili mo le tausaga faaletupe faaiiina aso 30 Iuni 2012 ua faamaonia.

P.P. 2014/2015 NU. 28, TALI ATU A LE MALO I LE P.P. 2013/2014 NU. 92, LIPOTI A LE KOMITI O TUPE MAUA MA TUPE TOTOGI I LE P.P. 2012/2013 NU. 61 & P.P. 2013/2014 NU. 75, LIPOTI FAALETAUSAGA A LE KAMUPANI VAALELE A LE POLENISIA MO TAUSAGA FAALETUPE FAAIUINA ASO 30 IUNI 2012 MA LE 30 IUNI 2013

FOFOGA FETALAI: Tulai mai lau Afioga i le Minisita o le Kamupani Vaalele a le Polenisia, lau Afioga i le Sui Palemia.

Tofa Hon FONOTOE NUA FESILI PIERRE LAUOFO (Sui Palemia): Lau Afioga i le Fofoga Fetalai, ou te tulai atu e faatu le lafo, *Ina ia faamaonia e leni Fono Aoa le P.P. 2014/2015 Nu, 28, o lo o tuuina atu Tali a le Malo i le P.P. 2013/2014 Nu, 92, Lipoti a le Komiti o Tupe Maua ma Tupe Totogi i le P.P. 2012/2013 Nu. 61 & P.P. 2013/2014 Nu, 75, Lipoti Faaletausaga a le Kamupani Vaalele a le Polenisia mo Tausaga Faaletupe faaiiuna aso 30 Iuni 2012 ma le 30 Iuni 2013.*

Ma e le leai se felafolafoaiga e faia i nei Tali e tusa ai ma le Tulafono Tumau 54.

Faaluaina e le Minisita o Tupe Maua, Minisita mo Galuega Tau Alamanuia ma Atinae a le Malo ma le Minisita mo Tina ma Tamaitai, Atinae o Nuu, Afioga ma Agafesootai.

FOFOGA FETALAI: Tulai mai lau Afioga i le Sui Palemia.

Tofa Hon FONOTOE NUA FESILI PIERRE LAUOFO: Lau Afioga i le Fofoga Fetalai, mo le silafia e le Maota atoa ai ma le faafofogaaga a le atunuu, e ia te au le agaga fiafia tele ou te faitauina ai nei Tali o lo o tuuina atu i leni Pepa:-

TALI ATU A LE MALO i LE P.P. 2013/2014 NU. 92, LIPOTI A LE KOMITI O TUPE MAUA MA TUPE TOTOGI i LE P.P. 2012/2013 NU 61 & P.P. 2013/2014 NU. 75, LIPOTI FAALETAUSAGA A LE KAMUPANI VAALELE A LE POLENISIA MO TAUSAGA FAALETUPE FAAIUINA ASO 30 IUNI 2012 MA LE 30 IUNI 2013.

E tusa ai ma le Lipoti a le Komiti o le Palemene ua taua i luga ma fautuaga na tuuina mai ai, ua tuuina atu i lalo tali e faatatau i fautuaga a le Komiti.

Fautuaga 1:

Ia galulue faatasi le Pulega o le Kamupani Vaalele o le Polenisia ma le Pulega o Malae Vaalele a Samoa, ma soalaupule auala e faaleleia atili ai le auaunaga e le gata mo le tautuaina o le atunuu femalagaai i vaalele, ae faapea foi i le tautuaina o Kamupani Vaalele mai fafo o lo o faaaogaina le malae vaalele i Faleolo.

Tali:

O le tulaga lava lea o lo o taumafai le Kamupani Vaalele o le Polenisia e faatino i taimi uma aua e le gata mo le faaleleia atili o le auaunaga ae ia faapea ona tumau ai pea ona maua le faatagana e

faaaauuina ai le faatinoina o nei auaunaga i le malae vaalele i Faleolo.

Fautuaga 2:

Ia feutagai ma saili auala pe ua talafeagai le faatumaotiina o le Kamupani Vaalele o le Polenisia ma avea o se Kamupani Tumaoui, ina ia pulea ma faagaoioi ana ia lava pulega ma matafaioi aua le sailia o ana tupe faasili. Ua fautuaina e le Komiti lea tulaga ona ua matauina le lelei faafoe o galuega tau pulega, ma o lo o matauina le siitia pea o tupe maua a le Polenisia e pei ona lipotia ma i Lipoti Faaletausaga nei e lua a le Kamupani.

Tali:

O lea tulaga ua uma ona i ai se Vaega Faapitoa i lalo o le faamalumaluga a le Matagaluega o Tupe o lo o silasila i ai. O se fautuaga mai lenei Vaega Faapitoa e auala mai i le Matagaluega o Tupe o le a faapea ona lauiliuina e le Kapeneta ma fai i ai se faaiuga e faatatau i lenei mataupu.

Fautuaga 3:

Ia toe liuliu le tofa i le Malo, pe talafeagai le faaaauu pea o le faaaogaina o le malae vaalele i Fagalii pe siitia uma atu femalagaiga i le malae vaalele Faava-o-Malo i Faleolo.

Tali:

O le toe tatalaina o le malae vaalele i Fagalii ia Iulai o le tausaga 2009 talu ona tapunia mai ia Ianuari o le tausaga 2005 ua mautinoa le faatoateleina ai o tagata femalagaai i le va o Samoa e lua. O le mafuaaga autu o lea tulaga ona o le faigofie o le sauniga ma le laitiiti o le taimi e alu i femalagaiga a le toatele o e femalagaai i le va o Samoa e lua talu ai ona o le tu latalata o Fagalii i le taulaga o Apia ma le vaega e tele pisinisi ma tagata o lo o aumau ai i Samoa. E taua tele i le Malo lenei tulaga o le lelei ma faigofie ona maua e o tatou tagata ma e femalagaa'i mai fafo le auaunaga o femalagaiga o lo o faafoe mai i le malae vaalele i Fagalii. Ona e le gata i le faafiafiaina ai o e fia femalagaai i le va o Samoa e lua, ae tele foi se manuia tau tamaoiga e auala mai ai mo a tatou pisinisi ma aiga taitasi.

Fautuaga 4:

Ia tulituliloa pea e le Pulega o le Kamupani a le Polenisia le Kamupani Vaalele a le Samoa Air ua tapunia nei mo le faamaeaina mai o le totagiina mai o ana aitalafu aua le faatumauina pea ma le siitia o tupe maua a le kamupani.

Tali:

O lo o faatinoina e le Pulega o le Kamupani lenei fautuaga i gaioiga faapisinisi masani e tataua ona faia mo tulaga faapenei ona o aitalafu o se laasaga masani i faiga faapisinisi.

O le tali atu lea ma le faaaloalo i lau Afioga i le Fofoga Fetalai.

Na tuuina atu le Fesili ma ina ua manumalo le Ioe, na tulai loa Tali Atu a le Malo i le P.P.2013/2014 Nu.92, Lipoti a le Komiti o Tupe Maua ma Tupe Totogi i le P.P.2012/2013 Nu.61 & P.P.2013/2014 Nu.75, Lipoti Faaletausaga a le Kamupani Vaalele a le Polenisia mo tausaga faaletupe faaiiina aso 30 Iuni 2012 ma le 30 Iuni 2013 ua faamaonia.

FOFOGA FETALAI: Ia, ou te manatu ona o lea ua tatou taunuu i le tatou taimi malolo masani o le taeao, e talitonu ai o le a tatau ona faia se tatou malologa leaga o le aso ua fesui ai a tatou taimi ona o le aso puupuu lenei, we finish at 12:00 o'clock this afternoon. Ia o lona uiga ua tatau ona tatou agai e fai se tatou morning tea, ona sauni mai lea o le Afioga i le Minisita mo Galuega, Felauaiga ma Atinae Eseeese a lo tatou Malo, o le isi Tali lena a le Malo lea e sosoo ai.

O le a faataatia ese Tualumaga a le Fono Aoa o Faitulafono mo lana malologa masani o lenei taeao.

Na faataatia ese Tualumaga a le Fono Aoa mo lana malologa masani i le itula e 10:14 i le taeao ma toe amatalia i le itula e 10:50 i le taeao.

FOFOGA FETALAI: Ou te faasilasila atu ua toe amataina nei Tualumaga a le Fono Aoa o Faitulafono.

E momoli atu le faafetai ma le faamalo i le onosai i le tatou Maota i lenei vaega o le taeao, e talitonu o lea ua maea le tatou taumafagati ma e i ai le faamoemoe ua maua lo outou malosai i le tino aua le tauavagameaina ma le faaumaina o a tatou galuega i lenei aso. E pei lava ona ou faasilasila atu o le aso o le aso puupuu tatou te malolo ai i le 12:00. O le ala foi lena o lo o tau faatulaga atu ai a tatou galuega, o ni mea e totoe i lenei aso, ona tatou taupule lea mo le vaiaso fou o le a faatulaga ai a tatou galuega aua o le manatu ma le lagona e fia faauauina a tatou galuega e pei ona faatulagaina.

O se tasi foi itu taua mo le silafia e le Palemene, o lea ua ese foi lenei taeao ma le tulaga i le tulai mai i le faasologa o tatou galuega. O lea ua maua lenei laolao taua e tuuina atu ai le avanoa i le Malo e tali atu ai i Lipoti e pei ona tuuina atu i Lipoti Faa-Palemene. E seasea foi tulai mai i a tatou Fonotaga i futia ua sola ma aso ua alu, ona o le tele naunau o galuega faatino aemaise polokalame a le Malo, a o lea lava ua tatou taunuu i taunuuga e le gata o lea ua tagofia galuega a le Malo, ae faapena foi galuega i le tuuina atu o Lipoti ma mea o lo o i ai atugaluga aemaise foi faamoemoe ma galuega o lo o feagai ai ma Komiti.

O le agaga lea, ia onosai mai le paia ma le mamalu maualuga o le Maota, e talitonu lava o lo o agai pea i luma a tatou galuega ina ia faatino ma le atoatoa, aemaise foi o Tali atu a le Malo. O lea ua tatou faafogafoga o lea ua ono Tali aloaia i lenei taeao. Ua ua fetau fola, o le finagalo ma manatu ma lagona o Komiti Faa-Palemene, o lea ua talifuaitau le Malo, ua malamalama ma manino mea uma e pei ona i ai fonotaga sa outou feagai ai, aemaise tulaga o suesuega ma faamaumauga i mea o lo o lipoti mai i totonu o Matagaluega ma Faalapotopotoga a le Malo. O le itu sili lena ma taua i le tatou Fonotaga lenei.

O lea ua tatou sitepu i le isi alafua ma le isi taamilosaga, e le gata i Tulafono ma Lipoti, a o lea ua tatou agai i Tali Aloaia a le Malo, o le itu sili lena i lenei aso fou. E i ai le faamoemoe o le a tatou faaauau ai pea mo le vaiaso fou ma nisi o Tulafono Faanatinati ua tuuina mai ua tatau ona faatinoina, ma o le agaga lena o le Fofoga Fetalai na tatalo atu ai ia lava pea le onosai ma le lavapapale.

E faia le tatou malologa ua tatou taunuu mai i le Nu. 8....

Afioga Hon PALUSALUE FAAPO II: Lau Afioga i le Fofoga Fetalai....

FOFOGA FETALAI: Ia lau Afioga i le Taitai o le Itu Agai.

Afioga Hon PALUSALUE FAAPO II: Leai e faamalulu atu i lau Afioga ona o lou tulai soo atu e uiga i le mataupu lea i Tali a le Malo. E ui lava e pei ona e saunoa e pei o se tulaga foi lea ua masani ai, ae i ai lou talitonuga e tatau lava ona i ai ni fesili e uiga i Tali o avanoa i felafolafoaiga aua o lea e manino lava i i le Tulafono Tumau 54 lea na e saunoa ai, e leai se mea o faasa ai felafolafoaiga aua a tali mai le Malo, e tatau ona fesiligia pe a i ai ni mea e tatau ona fesili ai.

FOFOGA FETALAI: O lea ua ou maua lou finagalo le Taitai o le Itu Agai, o lea ua ou maua lou finagalo Palu, o lea ua ou maua lou finagalo, taatia mai lea i le Fofoga Fetalai. O lea ua ou tuu atu le faamaoniga o mataupu uma nei e soalaupule ma Tali a le Malo. O le Tali a le Malo o le tali lena, ae o lo o i ai le avanoa i totonu o le Komiti e faatulaga ai a latou polokalame ma fetuunai i tulaga faa-Komiti. A o le taimi lenei i a tatou Tulafono Tumau, o le Tali e tuuina mai e aloaia i totonu o le Malo, o le Tali a le Malo, ia o le Tali lena.

P. P.2014/2015 NU. 29, TALI ATU A LE MALO I LE P.P.2013/2014 NU. 59, LIPOTI A LE KOMITI O GALUEGA, FELAUAIIGA MA SIOSIOMAGA I LE P.P. 2012/2013 NU. 73, LIPOTI FAALETAUSAGA A LE PULEGA O FELAUAIIGA I LE LAUELEELE MO LE TAUSAGA FAALETUPE FAAIUINA ASO 30 IUNI 2010

FOFOGA FETALAI: Tulai mai lau Afioga i le Minisita mo Galuega, Felauaiga ma Atinae Eseese.

Afioga Hon MANUALESAGALALA ENOKATI POSALA (Minisita mo Galuega, Felauaiga ma Atinae Eseese): Lau Afioga i le Fofoga Fetalai, ou te faatu le lafo, *Ina ia faamaonia e lenei Fono Aoa le P.P.2014/2015 Nu.29, o lo o tuuina atu ai Tali a le Malo i le P.P.2013/2014 Nu. 59, Lipoti a le Komiti o Galuega, Felauaiga ma Siosiomaga i le P.P. 2012/2013 Nu. 73, Lipoti Faaletausaga a le Pulega o Felauaiga i le Laueleele mo le Tausaga Faaletupe Faaiuina Aso 30 Iuni 2010, e tusa ai ma le Tulafono Tumau 54.*

Faaluaaina e le Minisita mo Leoleo ma Falepuipui, Auaunaga o Tinei Mu ma Faalavelave Tutupu Faafuasei, Minisita mo Punaoa Faanatura ma le

Siosiomaga, Minisita mo Galuega Tau Alamanuia ma Atinae a le Malo ma le Afioga i le Sui Palemia.

FOFOGA FETALAI: Ia tulai mai lau Afioga i le Minisita e tolaulau Tali a le Malo.

Afioga Hon MANUALESAGALALA ENOKATI POSALA: Lau Afioga i le Fofoga Fetalai ona o tali ua tuuina mai na o Tali, ae o lo o tuuina mai Fautuaga i le Lipoti a le Komiti o Galuega, o lea o le a ou taumafai e tuufaatasi mo le malamalamaaga o le paia o le Palemene nei i lenei taeao.’

O le Pepa e tali atu ai i Fautuaga e pei ona tuuina mai e le Komiti o Galuega e pei ona taua i luga:

TALI ATU A LE MALO I LE P.P.2013/2014 NU. 59, LIPOTI A LE KOMITI O GALUEGA, FELAUAIIGA MA SIOSIOMAGA I LE P.P. 2012/2013 NU. 73, LIPOTI FAALETAUSAGA A LE PULEGA O FELAUAIIGA I LE LAUELEELE MO LE TAUSAGA FAALETUPE FAAIUIA ASO 30 IUNI 2010.

Fautuaga 1:

E fautuaina le Pulega ina ia mataitu lelei le faatinoga o galuega a kamupani po o konekarate fai auala ua faamanuiaina mo galuega a le Malo, ina ia mautinoa le ausia o le tulaga aupito sili ona lelei o ia galuega ma faaititia ai tupe faaalua a le Malo i le toe faaleleia o auala pe a afaina, aemaise lava i taimi o tiumga ma le mamafa o uta feaveai a loli lau uta mamafa.

Tali:

O lo o i lalo o aiaiga o konekarate ua uma ona sainia ma kamupani tulaga e tataua ona i ai se taunuuga o se galuega. A solia e se kamupani aiaiga nei, o lo o i ai foi faasalaga faale-Tulafono i totonu o konekarate e faasalala ai e pei o le faamutaina o galuega. O tulaga i le ausia o tulaga lelei o galuega nei, e faamoemoe lava i se scope of works faapena specifications o lo o mafai ona tuuina mai e inisinia. A o le fausiaina o konekarate nei, ia o lo o galulue faatasi ai ma le Ofisa o le Loia Sili ina ia mautinoa, e ausia tulaga uma e faaleleia ai le faatinoga o galuega.

Fautuaga 2:

Galulue faatasi ma le Pulega o le Suavai ma le Faalapotopotoga o le Malosi Faaletise i le fausiaina o ni faafanua e iloa ai le faataatiaina o laina paipa ma laina eletise, ina ia faaititia ai le faaleagaina o alatele i le fesiitaiga o nei paipa.

Tali:

Ua i ai nei le Komiti o Galuega (Utilities Committee) e aofia uma ai Matagaluega ma Faalapotopotoga e aafia i le faatinoga o nei galuega i totonu o elele faaagaga a le Malo (road reserve).

O lenei Komiti e aofia ai le:-

- Matagaluega o Galuega, Felauaiga ma Atinae Tetele

- Matagaluega o Tina, Tamaitai ma Agafesootai
- Faalapotopotoga Malosi Faaeletise
- Pulega o Suavai
- Pulega o Felauaiga i le Laueleele
- BlueSky
- Digicel

Ia atonu foi o se tasi lenei o taua o lea ua i ai le Komiti lea, ae e i ai lava tulaga a uma ona faataatia laina o vaega taitasi, ona fai lea o le ata o le as built, o lona uiga o ata ia e mafai ona tuu faatasi e le Komiti lea ma maua ai se taatiaga o mea eseese nei mo le agai i luma ma polokalame o atinae.

Fautuaga 3:

Faatino ni polokalame faalauiloa mo le silafia e afioaga taitasi o le latou matafaioi i le tausia o alavai o latou auala galue pe a maea ona fausia e le Malo. O lea tulaga o le a faaitiitia ai tupe faaalu a le Malo i ia galuega faaopoopo.

Tali:

Ua maea faatinoina. O lo o atagia i taimi uma lava e tatala ai ni auala fou.

Ia o le tasi lea taua o le polokalame ma le faalauiloa ma tatala o auala i nuu, e mafai foi ona maua le avanoa e timai ai alii ma faipule, o le latou matafaioi a maea ona faatino le auala, ona tausii lea e faamama autafa ina ia aua ne i vave ona afaina nei aseta.

Fautuaga 4:

Silasila totoa i laisene o taavale o lo o faaoga e kamupani faatau taavale Dealer Plate mo le aveeseina mai o latou taavale mai le uafu, ona ua maitauina le faaogaina faasolitulafono.

Tali:

O lo o faatino lava lea vaega o le galuega e tusa ai ma aiaiga o le Tulafono Autu o Taavale Afi 1960, Vaega 19 i le iloilo ina lea o talosaga a i latou e talosaga mai mo Dealer Plate. O le iloiloaga muamua pe agavaa o se kamupani faatau taavale. A pasia, ona faamanino lea i ai o aiaiga mo le faaogaina o dealer plates ma aafiaga pe a sese ona faaoga.

O le faaogaina o ia dealer plates:-

- aumai ai taavale mai le uafu i Matautu i le kamupani faatau taavale
- faaoga i taimi e faataitai ai (test drive) le taavale i luga o auala
- faaoga pe a ave le taavale i le fale inisinia
- aumai ai le taavale e pasi ma lesitala i le Pulega o Felauaiga i le Laueleele

E mafai ona faaogaina faasaoloto i so o se taimi ma e pau na o taimi e pei ona taua i luga e mafai ai ona faaoga i luga o auala, e le mafai.

Fautuaga 5:

E fautuaina le Komiti Faatino mo le Pulega lea ia silasila totoa i le lesitalaina o so o se taavale, ia mautinoa le mulimulitaia o aiaiga mo le saogalemu.

Tali:

O lo o faaauau pea le vaega taua o le galuega o le faatinoga o le pasiaina o so o se taavale afi mo le saogalemu ma o lo o mulimulitai lava i aiaiga o le tulafono o le Road Fitness Guide 2002 e aofia uma ai taavale itu tauagavale ma le itu taumatau.

E tumau lava ona pasi faalua i le tausaga taavale laupasese, taxi ma pasi i le tai 6 masina aua lava le tulaga lelei o le saogalemu mo femalagaiga.

So o se taavale fou e tatau lava ona aumai i totonu e lesitala ma laisene. E le mafai ona pasia se taavale se i vagana ua aumai pepa o faamatalaga o taavale mai fafo e i ai le Deregistration Certificate po o le Export Certificate ma le Port of Entry mai le Ofisa o Tiute.

Fautuaga 6:

Silasila po o ua le talafeagai ona tuutiitia le tele o patupatu i vaega uma o le aualatele ona o lea ua lelei faagasolo le suiga o le itu auala.

Tali:

- Faapatupatu e 30% ua faaitiitia ai faapatupatu talu mai le suiga o le itu auala i le 2009. E fua lava le aveeseina o isi faapatupatu i luga o suesuega ma sailiiliga o tulaga tau le saogalemu.
- Faalauiloa e faamanino ai magaala e tuu avanoa (give way) – o lo o faaauau pea faalauiloa po o aoaoga faaletausaga a le Pulega e faamalalalama atili ai vaega e pei ona taua.
- O lo o galulue nei le Pulega i le faa-Samoaina talafeagai mo faailoilo taitasi. E pei ona silafia, o nisi faailoilo, e uumi ni faa-Samoa e ave i ai, Faataitaiga; Giveway – Tuu Avanoa.

A tusia i luga o faailoilo le faa-Samoa, ua ninii tele mataitusi ua avea ma ala e le o gatasi ai ma faiga faavae (specification) o le tusiaina o faailoilo. O lo o faatinoina foi i totonu o aoaoga o laisene avetaavale uiga o ata o lo o i luga o faailoilo. Ae mo le silafia, o lo o ua faaogaina lava e le Pulega le gagana Samoa ma le gagana Peretania i ana faailoilo ma e mafai ona faamautinoa lea vaega i galuega toe faaleleia o le Auala – East Cross Island Road – mai Tanugamanono i Siumu.

Fautuaga 7:

E fautuaina le Pulega mo le tausisia pea o le tuuina mai o ana Lipoti Faaletausaga i le Fono Aoao Faitulafono e tusa o aiaiga o le Tulafono.

Tali:

O lo o galulue ai le Pulega i le taimi nei e tuufaataasia Lipoti Faaletausaga 2010/2011, 2011/2012, 2012/2013 ia o lo o tuai ona faamaeaina. E faamoemoe e tuuina atu i le Kapeneta a o le i oo atu ia Iuni 2014, a o lea ua faatinoina lea vaega.

Fautuaga 8:

Faatino ni polokalame faale-Aoaoga mo le aufaigaluega e toe tapue ai le aga tapuia ma le vafealoai ma le atunuu lautele i le taliina o telefoni mo mataupu e valaau atu ai le mamalu o le atunuu.

Tali:

O lo o faaauau pea aoaoga (customer services) a le Pulega aua le talileleia o le atunuu i luga o telefoni faapea ma e o lo o autovaa mai i le Ofisa.

Susuga Hon Papaliitele Niko Lee Hang (Palota Taitoatasi): Lau Afioga i le Fofoga Fetalai....

FOFOGA FETALAI: Se i tulai mai le Taitaifono o le Komiti o Tupe Maua ma Tupe Totogi.

Susuga Hon Papaliitele Niko Lee Hang: Ma le faaaloalo tele, e le aoaia foi e Laupua Tamafaiga ae na o se tuualalo i lau Afioga i le Minisita ona o le Lipoti e aumai mea o ulutala o Fautuaga, a o le tulaga o le Lipoti i le Tali lea e fautua ai. O le tuualalo i le Afioga i le Minisita, se i faatonu le Pulega e tapena mai le Lipoti, ia sau le Fautuaga ma le Tali. O le Lipoti lea e aumai e faapu mai o Fautuaga, a o le tali lea ua le malamalama ai matou. Faafetai.

FOFOGA FETALAI: O lea ua maua le finagalo o le sui usufono, ma e manatu foi o lo o malamalama le finagalo o le Afioga i le Minisita ina ia tuufaatasi le Fautuaga ma le Tali mai a le Malo e pei ona tolaulauina i isi Lipoti muamua.

Na tuuina atu le Fesili ma ina ua manumalo le Ioe, na tulai loa Tali Atu a le Malo i le P.P.2013/2014 Nu.59, Lipoti a le Komiti o Galuega, Felauaiga ma Siosiomaga i le P.P.2012/2013 Nu.73, Lipoti Faaletausaga a le Pulega o Felauaiga i le Laueleele mo le tausaga faaletupe faaiiina aso 30 Iuni 2010 ua faamaonia.

P.P.2014/2015 NU.31, TALI ATU A LE MALO I LE P.P.2013/2014 NU.85, LIPOTI A LE KOMITI O TUPE MAUA MA TUPE TOTOGI I LE P.P.2012/2013 NU.51 & P.P.2013/2014 NU.14, FAAMATALAGA O TUPE A LE KOMITI O PETIPETIGA MO LE TAUSAGA FAALETUPE FAAIUINA ASO 30 IUNI 2011 & TAUSAGA FAALETUPE FAAIUINA ASO 30 IUNI 2012

FOFOGA FETALAI: Tulai mai lau Afioga i le Palemia.

Susuga Hon TUILAEPFA FATIALOFA LUPESOLIAI AIONO NEIOTI SAILELE MALIELEGAOI: Lau Afioga i le Fofoga Fetalai faapea foi le mamalu o le Maota; e tusa ai ma lau tusi o le aso 29 Aperila 2014, ou te tali atu e faapea:

- Ou te taliaina fautuaga 1, 2 ma le 3 a le Komiti ona ua maea ona fai i ai galuega a le Pulega o Petipetiga ma o lo o faagasolo pea ia galuega e pei ona i ai i totonu o fautuaga.
- Ou te taliaina le fautuaga 4 ma o lea ua fai i ai fuafuaga a le Pulega o Petipetiga.

Ma le faaaloalo lava.

Na tuuina atu le Fesili ma ina ua manumalo le Ioe, na tulai loa Tali Atu a le Malo i le P.P.2013/2014 Nu.85, Lipoti a le Komiti o Tupe Maua ma Tupe Totogi i le P.P.2012/2013 Nu.51 & P.P.2013/2014 Nu.14, Faamatalaga o Tupe a le Komiti o Petipetiga mo le tausaga faaletupe faaiiina aso 30 Iuni 2011 & tausaga faaletupe faaiiina aso 30 Iuni 2012 ua faamaonia.

P.P.2014/2015 NU.30, TALI ATU A LE MALO I LE P.P.2013/2014 NU.91, LIPOTI A LE KOMITI O GALUEGA, FELAUAIIGA MA SIOSIOMAGA I LE P.P.2013/2014 NU.6, LIPOTI FAALETAUSAGA A LE PULEGA O MALAE VAALELE A SAMOA MO LE TAUSAGA FAALETUPE FAAIUINA ASO 30 IUNI 2011

FOFOGA FETALAI: Tulai mai lau Afioga i le Minisita mo le Pulega o Malae Vaalele.

Afioga Hon MANUALESAGALALA ENOKATI POSALA: Lau Afioga i le Fofoga Fetalai ou te faatu le lafo, *Ina ia faamaonia e lenei Fono Aoao le P.P.2014/2015 Nu.32, tali atu a le Malo i le P.P.2013/2014 Nu. 58, Lipoti a le Komiti o Galuega, Felauaiiga ma Siosiomaga i le P.P.2011/2012 Nu.65 & P.P.2011/2012 Nu.90, Lipoti Faaletausaga a le Pulega o Malae Vaalele a Samoa mo le Tausaga Faaletupe Faaiiina aso 30 Iuni 2010 e tusa ai ma le Tulafono Tumau 54.*

Faaluaina e le Minisita mo Punaoa Faanatura ma le Siosiomaga ma le Minisita mo Galuega Tau Alamanuia ma Atinae a le Malo.

FOFOGA FETALAI: Tulai mai lau Afioga i le Minisita e fai le tali.

Afioga Hon MANUALESAGALALA ENOKATI POSALA: Lau Afioga i le Fofoga Fetalai, ou te faitauina atu Tali ua tuuina mai:

I le maea ai o Iloiloga a le Komiti, na faaiugafonoina ai e fautuaina le Malo ina ia:

1. Silasila i ni aiaiga talafeagai mo le toe faafoi o le auaunaga tau malae vaalele i (ground handling) e faafoe e le Pulega o le Malae Vaalele ona e talitonu le Komiti o le latou lea matafaioi, e le gata i lea ae o le

a fesoasoani tele i le faafitauli o feagai ma le Pulega i le tulaga tau tupe maua mo le faatupeina o ana galuega faatino.

Tali a le Malo:

E sao le fautuaga a le konekarate mo le (ground handling) i le Pulega o le Malae Vaalele. O le konekarate sa tuuina e le Malo i le Polenisia e fesoasoani ai i ana tupe maua, ae ua avea ma auala ua le totogia ai e le Polenisia i le malae vaalele le tau masani e 10% i le tausaga e pei ona aiaia ai i konekarate faapea i isi malae vaalele faava o Malo. Sa tatau i le Polenisia ona totogi le \$400,000 i le tausaga i le Pulega, ae peitai, na o le \$1,000 i le masina o lo o totogi i le taimi nei, ona o lea foi ua polofiti faafia le Polenisia ua pitia ai tele e le Pulega le fautuaga ina ia toe faasee mai lea konekarate e toe vaaia e i latou ma fesoasoani ai i ana tupe maua. Ou te manatu o le tasi lea vaega e pei ona i ai le faafitauli lea sa tulai mai i le stairs lea na faaletonu ona o tulaga o lo o faatino e le Polenisia, e fai si matuia ona o tulaga i le oo mai o se Taitai o se Malo ae i ai le faaletonu lea. E a Ulu tafega ae ua selefutia ai le malae vaalele ona o tulaga ia. Ae ona o le tulai mai o le Polenisia, ou te manatu o lea foi ua i ai se tasi o tamalii o le atunuu ua tulai mai i le Pule fou o le Polenisia, o tulaga ia e tatau ona tagai i ai ina ia faaleleia le auunaga.

2. E tatau ona agavaa le Pulega i vaegatupe o fesoasoani a le Malo mo auunaga i le Atunuu lautele, CSO e faatupe ai nisi o ana auunaga, e fesootei ma faamoemoega na faavae ai ia vaegatupe.

Tali a le Malo:

O malae vaalele i Maota ma Asau o lo o faafoeina e le Pulega i se tulaga e le o mafai ona maua ai se tupe faasili, ona o le itiiti o malaga a vaalele e faaaogaina ai le malae vaalele. E taugata le faatumauina o tapulaa mo le saogalemu o ia malae vaalele i lalo o laisene ma faatagaga o lo o faamatu e le Matagaluega o Galuega, Felauaiga ma Atinae Esee. O ia tapulaa mo malae vaalele o lo o suesueina faapitoa, Safety Audit i tausaga taitasi aua le faatumauina o le saogalemu mo ni femalagaaiga a vaalele sivili e lagolagoina le agavaa o le Pulega i vaegautupe CSO aua le faatumauina o le tatalaina pea o ia malae vaalele e tusa pe le maua ai ni tupe maua a le Pulega.

3. E fautuaina le Pulega ina ia tapena faamaea fuafuaga mautu mo tulaga faatino alualumamao master plan e limataitaiina ai ana galuega faatino mo le lumanai. Etalitonu le Komiti o auunaga lautele e aofia ai le Pulega o malae vaalele e moomia tele ai le i ai o ia ituaiga fuafuaga.

Tali a le Malo:

E ioeina e le Pulega lea Fautuaga ona o se Airport Master Plan e faataoto ai ma fuafua le faaaogaina o fanua o le Pulega i le isi 20 tausaga o lumanai. O lo o i ai nei i totonu o le polokalame o fesoasoani a le World Bank le toe iloiloina ma le faaleleia o lea Master Plan.

Ia o tali ia ma fautuaga sa tuuina mai e le Komiti i lau Afioga i le Fofoga Fetalai.

Na tuuina atu le Fesili ma ina ua manumalo le Ioe, na tulai loa Tali Atu a le Malo i le P.P.2013/2014 Nu.91, Lipoti a le Komiti o Galuega, Felauaiga ma Siosiomaga i le P.P.2013/2014 Nu.6, Lipoti Faaletausaga a le Pulega o Malae Vaalele a Samoa mo le tausaga faaletupe faaiiina aso 30 Iuni 2011 ua faamaonia.

FOFOGA FETALAI: Ia, e talitonu o lea ua maea le tatou galuega e pei ona faatulagaina i le Pepa o Galuega i lenei aso. Ma e i ai le lagona ua tatau ai foi ona faia se tatou malologa. E pei lava ona taumafai atu i fatia ua sola ma le taimi ua alu, ona o lo o tele ma anoanoai tulaga i galuega faale-Malo aemaise foi o fuafuaga faa-Palemene i lenei aso, ou te manatu ai ua tatau ona lava le galuega mo tatou polokalame o lenei Aso Faraile. E momoli atu ai le faafetai tele i le paia ma le mamalu maualuga o le tatou Maota, faafetai atu onosai mai ma le usugafono i le Fonousu a Samoa i lenei aso. Le paia e ma le mamalu o lau Afioga i le Palemia ma lau Kapeneta, ia, aemaise foi le afio o le Afioga i le Taitai o le Itu Agai, aemaise o lea tala na atoa o le tatou Maota nei. Faamalo atu le usufono, faafetai onosai mai o lea ua tatou taunuu i le faaiuga o lenei vaiaso. E talitonu foi le faamoemoe tatou te sailiili malosi i le Aso Gafua o le a sau nei mo le vaiaso fou, o lo o i ai nisi o tatou Tulafono Tau Faaofi ua uma ona tuuina mai i le Tulaga Faanatinati e pei ona talanoaina nisi o Tulafono taua ua tatau ona faamaeaina, aemaise foi o nisi o tulaga e faagaoioia ai galuega a le Kapeneta ma le Malo, e tatalo atu ai ina ia onosai mai le tatou Maota mo le Aso Gafua po o le Aso Lua pe a lava pea le tulaga o tatou galuega faapolokalameina.

A o lenei itula, e momoli atu moomooga alofa i le faaiuga o lenei vaiaso. Tatou talosia ma tatou faanonomanu pea i le gasegase o le Afioga i le Sui Taitai o le Itu Agai le Afioga ia Aeau, tau ina ia alofagia e le Atua lona faatafagasegase ia taulu taulu taulu tatou feiloai i le vaiaso fou. E faapena foi ona tatou talosia le faimalaga atu o le tatou Palemene ma le Malo i toe saafiafiga ma toe sauniga o le Tama Matua ia Tuiloa mo Salafai, e i ai le talitonuga o le a tatou fesilafai ai i le aso a taeao.

Faafetai atu Samoa i lau tapuaiga i lenei aso. E manatu o lea e taeao segisegi lenei aso i le alafai mai i faguga lelei, tau ina manuia feau ma tiute ma galuega o le a feagai ai, aemaise o le gasolo atu i le faaiuga ma le Sapati o lumanai.

Faafetai atu foi i Ofisa Sili o Pulega ma Pule Sili o Matagaluega ma Faalapotopotoga a le Malo ua tatou mafuta i lenei aso, viia pea le Atua i lo outou soifua auauna.

A o le i tolopoina le tatou Fono, ou te tatalo atu i lau Susuga i le Alii Taiala Tuuu e tulai maia e fauma le tatou Fonotaga i se tatalo ona tatou tolopo ai lea.

Na tolopo Taulumaga a le Fono Aoao i le itula e 11:21 i le taeao seia aulia le itula e 9:00 i le taeao o le Aso Gafua, 23 Iuni 2014.

